

**ODBOJKAŠKI SAVEZ FEDERACIJE BOSNE I HERCEGOVINE**

**P R A V I L N I K  
O ODBOJKAŠKIM SUDIJAMA DELEGATIMA I DELEGATIMA-  
KONTROLORIMA SUĐENJA**

Tuzla, 12.06.2024. godine

Na osnovu člana 50. Statuta OS F BiH, Upravni odbor OS FBiH na sjednici održanoj 12.06.2024. godine, usvojio je

## P R A V I L N I K

o sticanju zvanja odbojkaških sudija, delegata i delegata - kontrolora suđenja u  
Odbojkaškom savezu Federacije Bosne i Hercegovine

### I - OPŠTE ODREDBE

#### Član 1.

Ovim pravilnikom se reguliše sticanje uslova, prava, obaveza i odgovornosti i nadležnosti u provođenju odredbi Zakona o sportu BiH koje se odnose na stručne poslove suđenja, kontrole i unapređenja suđenja u odbojkaškom sportu.

#### Član 2.

Stručni poslovi suđenja, kontrole i unapređenja suđenja u odbojkaškom sportu su poslovi sudija, kontrolora suđenja i Komisije za sudijska pitanja OS F BiH i stručnih tijela koja se bave tim poslovima.

### II - SUDIJSKA ZVANJA-RANGOVI I STICANJA RANGOVA U OS F BiH

#### Član 3.

Odbojkaški sudija je lice koje posjeduje adekvatno znanje, sposobnost i kvalifikacije za suđenje odbojkaških utakmica.

Zvanične odbojkaške utakmice u OS F BiH, mogu suditi samo lica sa zvanjem odbojkaški sudija, odnosno lica koja su položila ispit za sticanje zvanja odbojkaškog sudije, koja imaju licencu nadležnog saveza i koja se nalaze na nekoj od sudijskih listi.

Sudije koje nastupaju za Klubove mogu se nalaziti na "A" i "B" listi Super lige OS F BiH, ali ne mogu suditi u istom rangu takmičenja u kojem igraju.

Zvanje odbojkaškog sudije se ne može steći prije 16 (šesnaest) navršenih godina starosti, dok se teoretski dio ispita može polagati i sa navršenih 14 (četnaest) godina starosti.

Komisija za polaganje sudijskih ispita je u stalnom sastavu i to:

- predsjednik Komisije za sudijska pitanja OS F BiH,
- predsjednik Komisije za kontrolu i unapređenje suđenja OS F BiH,
- komesar regije u kojem se polažu sudijski ispiti.

#### Član 4.

U okviru OS F BiH utvrđuje se postojanje 6 rangova (sudijskih zvanja) sudija i to 3 domaća ranga (I, II, III) i 3 međunarodna ranga (IV, V, VI). Sticanja rangova:

DOMAĆI

#### Član 4.1.

##### **- I : Odbojkaški sudija**

Predsjednik sudijskog odbora upućuje zahtjev sudijskoj komisiji OSFBiH za organizovanje i održavanje ispita. Nakon usvajanja zahtjeva sudijske komisije FBiH predsjednik Sudijske komisije OS FBiH obavještava pismenim putem UO OSFBiH o mjestu i vremenu održavanja ispita za koji mora dobiti pismenu saglasnost od UO OS FBiH. Komisiju za polaganje sudijskih ispita OS F BiH kada dobije saglasnost od UO OSF BiH o tome obavještava Klub ili klubove u toj regiji / kantonu, kao i kandidate i to 15 dana prije utvrđenog termina za polaganje sudijskog ispita. Prijave za polaganje ispita Klubovi i kandidati dostavljaju Predsjednicima odbora najkasnije 30 dana prije utvrđenog roka za polaganje.

Svi troškovi komisije za polaganje idu na teret pojedinca koji je zainteresovan za polaganje sudijskog ispita ili Kluba koji podnese zahtjev za polaganje kandidata.

Ispit sprovodi Komisija čije je sastav sljedeći, a Odluku o imenovanju komisije donosi UO OSFBiH.

- Član sudijske komisije OSFBiH – predsjednik, ili neko od ostala dva člana
- Državni sudija iz mjesta polaganja ili iz najbližeg mjesta – član
- Predsjednik sudijskog odbora – član

Kandidati imaju pravo dva puta da polažu ispit za zvanje odbojkaški sudija. Kandidati koji ne polože ispit, mogu ga ponoviti još jednom u narednih 6 mjeseci .

Komisija za sudijska pitanja OS F BiH na osnovu izvještaja Komisije, evidentira kandidate koji su položili ispit u zvanje odbojkaški sudija i pismeno obavještava UO OSFBiH koji donosi Odluku o rangu gdje se i na kojoj listi nalazi kandidat koji je položio ispit.

Taksa za polaganje sudijskih ispita za zvanje odbojkaškog sudije je 20,00 KM.

#### Član 4.2.

##### **- II : Regionalni sudija**

Na prijedlog sudijskog odbora i saglasnost SK OSFBiH određuju se organizovanje i predlažu kandidati za polaganje sudijskog ranga – regionalni odbojkaški sudija. Kandidati moraju imati najmanje dvije godine aktivnog suđenja kao linijske sudije i zapisničari na ligama OS F BiH ili najmanje pet godina licencirani igrači/ce Superlige OS F BiH i Premijer lige OS BiH, s tim da igrači/ce moraju suditi u rasponu između I i II ranga 6 mjeseci.

Nakon odobrenog zahtjeva od strane Sudijske komisije OSFBiH za polaganje ispita, imenovana komisija obavještava kandidate i to 45 dana prije utvrđenog termina za polaganje ispita. Prijave za polaganje ispita kandidati dostavljaju Sudijskoj komisiji OS F BiH u kancelariju OS FBiH najkasnije 30 dana prije utvrđenog roka za polaganje.

Ispit se održava maksimalno dva puta godišnje.

Svi troškovi polaganja idu na teret kandidata.  
Ispit provodi Komisija za polaganje sudijskih ispita imenovana od strane Upravnog odbora OS F BiH.

Ispit se sastoji od teoretskog i praktičnog dijela.

Kandidati mogu pristupiti polaganju praktičnog dijela ispita ako su prethodno položili teoretski dio. Praktični dio ispita obuhvata: • suđenje utakmice kao prvi sudija • suđenje utakmice kao drugi sudija • vođenje utakmice kao zapisničar.

Za polaganje praktičnog dijela ispita, utakmice moraju biti najmanje nivoa prve lige OS F BiH.

Kandidati imaju pravo dva puta da polažu ispit za zvanje regionalnog odbojkaškog sudije. Kandidati koji ne polože ispit, mogu ga ponoviti još jednom u roku od 6 mjeseci.

Sudijska Komisija na osnovu izvještaja Komisije za polaganje sudijskih ispita, sudije koji su položili kompletan ispit, proglašava regionalnim sudijama, a o tome pismeno izvještava UO OSFBiH koji donosi Odluku o rangiranju osobe koja je položila ispit.

Taksa za polaganje sudijskih ispita za zvanje regionalnog sudije je 60,00 KM.

#### Član 4.3.

##### **- III : Državni sudija**

Sudijska komisija OSFBiH određuje kandidate za sticanje zvanja Državnog odbojkaškog sudije. Kandidati moraju imati najmanje 2 godine aktivnog suđenja na B listi i listi Prve lige OS FBiH kao regionalni odbojkaški sudija.

Komisija obavještava kandidate 45 dana prije utvrđenog termina za polaganje ispita. Prijave za polaganje ispita kandidati dostavljaju SK OSFBiH (sekretaru) u kancelariju OS FBiH najkasnije 30 dana prije utvrđenog roka za polaganje.

Ispit se provodi jednom godišnje prije početka sezone.

Svi troškovi polaganja idu na teret kandidata.

Ispit provodi Komisija za polaganje sudijskih ispita, a na prijedlog Sudijske komisije OS FBiH a UO OSFBiH donosi Odluku o sastavu komisije. Komisiju čine:

1. Delegat – kontrolor sa liste Premijer lige OSBiH
2. Međunarodni sudija
3. Delegat – kontrolor ili sudija sa liste OS FBiH ili OS BiH

Ispit se sastoji od teoretskog i praktičnog dijela.

Kandidati mogu pristupiti polaganju praktičnog dijela ispita ako su prethodno položili teoretski dio. Praktični dio ispita obuhvata: • suđenje utakmice kao prvi sudija • suđenje utakmice kao drugi sudija • vođenje utakmice kao zapisničar.

Za polaganje praktičnog dijela ispita, utakmice moraju biti najmanje nivoa Superlige OS F BiH.

Kandidati imaju pravo dva puta da polažu ispit za zvanje Državnog odbojkaškog sudije. Kandidati koji ne polože praktični dio ispita, mogu ga ponoviti još jednom u roku od 6 mjeseci.

Sudijska Komisija na osnovu izvještaja Komisije za polaganje sudijskih ispita, prijedlog za proglašenje o položenom ispitu pismenim putem dostavlja UO OSF BiH koji donosi Odluku i proglašava kandidate Državnim sudijama.

Taksa za polaganje sudijskih ispita za zvanje državnog sudije je 80,00 KM.

Od uplaćenih taksi, 50% se uplaćuje na račun OSFBiH, a 50% pripada Komisiji za polaganje ispita. Komisija za polaganje sudijskih ispita dužna je dostaviti pismeni izvještaj u roku od 7 dana Upravnom odboru OSFBiH. Također Komisija za sudijska pitanja dužna je preko kancelarije OSFBiH obezbijediti grb za odgovarajući rang kandidatima koji su položili ispit. Cijena grba iznosi 15.00 KM .

#### Član 4.4

##### MEĐUNARODNI

- IV : kandidat za međunarodnog sudiju
- V : međunarodni sudija
- VI : FIVB sudija

Sudija koji se upućuje od strane OS BiH na kurs za sticanje zvanja kandidata za međunarodnog odbojkaškog sudiju (IV rang), mora ispunjavati sljedeće uslove:

- da se nalazi na listi najvišeg ranga takmičenja u OS BiH, 3 godine u kontinuitetu,
- da je u posljednjih 5 godina najmanje 3 godine prijavljen FIVB,
- da se u zadnje 3 godine nalazi u gornjem dijelu jedinstvene rang liste sudija Premijer lige BiH,
- da je na dan polaganja ispita mlađi od 41 godine života,
- da poznaje vođenje međunarodnog elektronskog zapisnika,
- da tečno govori i piše engleski jezik, što potvrđuje certifikatom nadležne ustanove ili testiranjem pred ovlaštenim stručnjakom za engleski jezik.

#### Član 5.

Komisija za sudijska pitanja OS BiH na kraju svake kalendarske godine utvrđuje listu kandidata, na osnovu koje UO OS BiH predlažu sudije koje su ispunile uslove za upućivanje na kurs za kandidate za međunarodne sudije u narednoj godini.

#### Član 6.

Ukoliko u jednoj sezoni više sudija stekne uslove za listu kandidata za međunarodnog sudiju, prednost za upućivanje na kurs ima sudija koji je bolje plasiran u posljednje dvije takmičarske sezone i koji se prvi put upućuje na kurs.

#### Član 7.

Sudija koji se nalazi na listi kandidata gubi status kandidata i briše se sa liste ukoliko na kraju sezone ispadne sa liste, a po povratku na listu mora ponovo ispuniti sve uslove iz Pravilnika u cjelosti.

Ukoliko i po drugi put ispadne sa liste, gubi status kandidata trajno.

#### Član 8.

Ako sudija koji se po redoslijedu upućuje na seminar, te iz opravdanih razloga odustane od seminara zadržava svoj status i mjesto na listi, a umjesto njega upućuje se naredni kandidat.

U ponovljenom slučaju, sudija gubi svoj status i mjesto na listi.

#### Član 9.

Sudija koji po drugi put izgubi status kandidata na osnovu prethodnog člana, ne može više steći taj status.

#### Član 10.

Na zahtjev odbojkaškog sudije koji je pozvan na seminar za kandidata za međunarodnog odbojkaškog sudiju, Upravni odbor OS BiH može odlučiti da mu se pruži finansijska pomoć.

Negativan uspjeh na seminaru povlači za sobom povrat sume uplaćene na ime finansijske pomoći u roku od mjesec dana od dana završetka seminara.

#### Član 11.

Kandidat koji se upućuje na seminar dužan je položiti preliminarni test prije zvanične prijave na seminar.

#### Član 12.

Uslovi za sticanje V i VI ranga definisani su propisima FIVB.

#### Član 13.

### IV – DELEGATI

Delegati stalnih takmičenja u OS F BiH mogu biti istaknuti sportski radnici, koji su dali doprinos razvoja odbojkaškog sporta na području Federacije i Države BiH.

Na prijedlog Komisije za sudijska pitanja OS F BiH, UO OS F BiH usvaja listu delegata OS F BiH.

#### Član 14.

Delegati mogu vršiti dužnost do 65 godina starosti.

Delegati su dužni prisustvovati seminaru službenih lica za stalna takmičenja u OSFBiH, u suprotnom delegati koji ne budu bili na seminaru ne mogu dobiti licencu za obavljanje službene dužnosti u tekućoj sezoni.

#### Član 15.

Delegat koji je na kraju takmičarske sezone ispaao sa liste stalnih takmičenja OS FBiH, a ispunjava propisane uslove da bude preveden u kontrolora, može biti uvršten samo na sljedeću nižu listu u odnosu na onu sa koje je ispaao, bez obzira na rang koji ima.

Godina u kojoj delegat ispadne sa liste, ne broji se u zbirne godine potrebne za prevođenje u kontrolora.

### IV – DELEGATI - KONTROLORI SUĐENJA

#### Član 16.

Kontrolor suđenja je lice koje posjeduje adekvatno znanje, iskustvo i kvalifikacije za ocjenjivanje suđenja na odbojkaškim utakmicama.

Kontrolu i ocjenjivanje suđenja na zvaničnim utakmicama može vršiti samo lice koje se nalazi na listi kontrolora suđenja.

#### Član 17.

Zvanje (status) kontrolora suđenja može steći odbojkaški sudija najmanje trećeg stepena, koji nadležnom sudijskom organu OS FBiH podnese zahtjev za prevođenje u status kontrolora i koji ispunjava propisane uslove.

Odbojkaške sudije koje navrše 55 godina života ili zbog zdravstvenih razloga ili poslovnih obaveza prestaju sa aktivnim suđenjem, prevode se u delegate - kontrolore, ako za to ispunjavaju predviđene uslove. Odluku o tome donosi Upravni odbor OSF BiH.

#### ***Obaveze kontrolora suđenja prije, za vrijeme i poslije utakmice***

#### Član 18.

Kontrolor svoju dužnost obavlja sjedeći za stolom pokraj zapisničara.

Kontrolor tokom utakmice prati rad službenih lica (prvog sudije, drugog sudije, zapisničara i linijskih sudija) te po završetku utakmice ocjenjuje njihov rad.

Kontrolor se tokom utakmice NE SMIJE miješati u donošenje odluka tehničke prirode (zadržana lopta, dodir mreže, dvostruki dodir...) niti sugerisati sudijama da isprave svoje odluke bilo koje vrste.

Kontrolor može intervenisati SAMO AKO utvrdi da bi moglo doći do povrede Pravila igre zbog koje bi moglo doći do ponovnog odigravanja utakmice (dozvoljavanje sedme izmjene, upisivanje drugog žutog kartona istoj ekipi...)

Kontrolor NE SMIJE prije, za vrijeme i poslije utakmice komentarisati suđenje sa bilo kim drugim osim sa službenim licima.

Prije utakmice kontrolor će obaviti razgovor sa svim službenim licima na kojem će im skrenuti pažnju na važnost saradnje tokom utakmice.

Po završetku utakmice kontrolor će obaviti razgovor sa službenim licima u svlačionici, i to sljedećim redoslijedom: prvo sa linijskim sudijama i zapisničarom, a kad oni napuste prostoriju nasamo sa prvim i drugim sudijom.

Kontrolor će prilikom analize sudijama istaknuti njihove pozitivne aspekte suđenja te skrenuti pažnju na stvari koje trebaju korigirati ili propuste koje su učinili. Ukoliko dođe do materijalne povrede pravila I ponavljanja utakmice domaća ekipa snosi troškove organizacije utakmice, gostujuća ekipa snosi troškove dolaska na utakmica a ista službena lica sude istu utakmice bez ikakve naknade (nemaju takes, troškove putovanja i dnevnice) jer su svi saučesnici događaja.

Kontrolor će po završetku utakmice u roku od 30 minuta putem aplikacije Unos rezultata unijeti sve podatke koji su potrebni za izradu biltena, a u roku od 72 sata po završetku utakmice popuniti R4 obrazac sa ocjenom i opisom suđenja koji je dužan dostaviti Sudijskoj komisiji OS FBiH u elektronskoj formi (e-mailom) te OS FBiH putem pošte.

#### Član 19.

U dužnost kontrolora može se prevesti sudija koji je najmanje 5 godina uspješno sudio utakmice najvišeg ranga takmičenja u OS F BiH ili 4 godine Premijer ligu OS BiH.

Na osnovu rang liste kontrolora i na prijedlog OS FBiH, kontrolori mogu preći na listu stalnih takmičenja OS BiH.

#### Član 20.

Delegat-kontrolor koji je napravio pauzu od dvije ili više godina, može biti preveden u delegata-kontrolora ali se prve godine uvrštava na nižu listu od one za koju je stekao uslov.

#### Član 21.

Delegat-kontrolor koji dva puta spadne sa liste, ne može više biti na listi delegata-kontrolora u najvišem rangu takmičenja. Ukoliko neko od delegata-kontrolora se nalazi na listama a nije ispunjavao uslove propisane ovim Pravilnikom ili ne ispunjava uslove po ovom Pravilniku, po automatizmu se vraća na listu gdje je ranije bio odnosno podliježe preispitivanju znanja na listi gdje bude vraćen.

#### Član 22.

Kontrolor može vršiti kontrolu suđenja do 65 godina starosti.

Ako prije početka takmičarske sezone nije navršio 65 godina, kontrolu suđenja može obavljati do kraja te sezone.

### V - FORMIRANJE LISTA SUDIJA I KONTROLORA

#### Član 23.

Službenu dužnost na zvaničnim takmičenjima u organizaciji OS F BiH mogu obavljati sudije i kontrolori koji ispunjavaju propisane uslove i koje određuju nadležni organi saveza.

#### Član 24.

Službenu dužnost na zvaničnim takmičenjima u organizaciji OS F BiH mogu obavljati sudije i delegati i delegati-kontrolori koji se nalaze na listama sudija i kontrolora suđenja stalnih takmičenja OS F BiH.

Delegati kontrolori sa Premijer lige OS BiH mogu obavljati dužnosti na utakmicama u organizaciji OS FBiH ali prednost imaju delegati sa liste OS FBiH. Delegati-kontrolori sa liste



Super lige OS FBiH mogu obavljati tu dužnost i na utakmicama Prvih liga OS FBiH.

#### Član 25.

Na listama sudija i kontrolora stalnih takmičenja OS F BiH mogu se nalaziti sudije i kontrolori koji imaju najmanje državni rang.

Sudije i kontrolori na listama za stalna takmičenja OS F BiH moraju ispunjavati uslove predviđene ovim Pravilnikom.

#### Član 26.

U istom rangu takmičenja na listi službenih lica ne mogu se nalaziti sudija i kontrolor koji su u bliskim rodbinskim vezama, koje mogu imati uticaja na napredovanje ili zadržavanje na listi i na regularnost takmičenja.

Bliskim srodnicima u smislu prethodnog stava smatraju se:

- Srodnici u prvoj liniji krvnog srodstva.
- Srodnici u pobočnoj liniji zaključno sa trećim stepenom.
- Srodnici u prvom stepenu tazbinskog odnosa.

#### Član 27.

Liste sudija i kontrolora stalnih takmičenja OS F BiH predlaže Komisija za sudijska pitanja OS F BiH, a usvaja Upravni odbor OS F BiH za svaku takmičarsku sezonu najkasnije do kraja juna ili do okončanja održavanja seminara za službena lica.

Prijedlog Komisija za sudijska pitanja OS F BiH dostavlja pismenim putem u kancelariju Saveza.

#### Član 28.

Odlukom Upravnog odbora OS F BiH utvrđuje se lista službenih lica za stalna takmičenja u organizaciji OS F BiH.

#### Član 29.

Po završetku takmičarske sezone, Komisija za sudijska pitanja OS F BiH na osnovu prijedloga Komisije za kontrolu i unapređenje suđenja objavljuje jedinstvenu, konačnu rang listu sudija stalnih takmičenja OS F BiH.

Sa konačne rang liste sudija stalnih takmičenja OS F BiH ispadaju po dva najlošije plasirana sudca.

#### Član 30.

Komisiju za rangiranje kontrolora čini Komisija za kontrolu i unapređenje suđenja.

Nakon završetka svih utakmica stalnih takmičenja u OS F BiH, a najkasnije u roku od 10 dana Komisija za kontrolu i unapređenje suđenja OS F BiH na osnovu Kriterija za rangiranje kontrolora obavlja njihovo rangiranje i dostavlja predsjedniku Komisije za sudijska pitanja OS F BiH, konačnu rang listu kontrolora za stalna takmičenja u OS F BiH.

Po završetku takmičarske sezone, Predsjednik Komisije za kontrolu i unapređenje suđenja OS F BiH na osnovu Kriterija za rangiranje delegata i delegata-kontrolora objavljuje jedinstvenu konačnu rang listu delegata-kontrolora stalnih takmičenja OS F BiH.

Sa konačne rang liste delegata-kontrolora stalnih takmičenja OS F BiH ispada po jedan najlošije plasirani delegat-kontrolor iz OS F BiH.

#### Član 31.

Sudijsku dužnost sudija može obavljati do navršenih 55 godina života.

Ako prije početka takmičarske sezone nije navršio 55 godina suđenje može obavljati do kraja te sezone.

Sudije koji se prvi prvi put predlažu za listu sudija stalnih takmičenja OS BiH ne mogu biti stariji od 35 godina.

Odredba iz prethodnog stava se ne odnosi na igrače-ice koji-e su bili-e registrovani-e za takmičenje u ligama OS F BiH u sezonama nakon navršenih 35 godina.

#### Član 32.

U istoj takmičarskoj sezoni sudija može istovremeno obavljati dužnost sudije i kontrolora na listama stalnih takmičenja OS F BiH. Odluku donosi UO OSFBiH.

#### Član 33.

Ako sudija ili kontrolor dva puta ispadne sa liste službenih lica za stalna takmičenja OS F BiH isti ne može biti predložen na tu listu u naredne tri godine.

Ako i nakon povratka na listu službenih lica za stalna takmičenja OS F BiH, sudija ili kontrolor ispadne sa liste nema više pravo povratka na tu listu.

#### Član 34.

Ukoliko u toku takmičarske sezone sudija svojom krivicom ne ispuni predviđenu kvotu suđenja, smatraće se da je ispao sa liste sudija stalnih takmičenja OS F BiH i u narednoj sezoni ne može obavljati dužnost sudije na sudijskoj listi stalnih takmičenja OS F BiH.

Ukoliko sudija ne ispuni predviđenu kvotu suđenja iz objektivnih razloga, na kraju sezone ostaje na listi kao nerangiran.

#### Član 35.

Ukoliko sudija ili kontrolor zatraži mirovanje staža iz opravdanih razloga trudnoća, porođaj, bolest, školovanje, službeni odlazak u inostranstvo i privremeno preseljenje u drugu državu zadržava pravo da po prestanku razloga za mirovanjem staža bude vraćen na listu stalnih takmičenja OS F BiH.

Zahtjev za mirovanje staža podnosi se u pisanom obliku sa priloženim dokumentima koji su dokaz činjenica iz stava 1 ovog člana i dokazom o uplati članarine za tu sezonu za koju traži mirovanje statusa.

Ako mirovanje staža traje duže od dvije takmičarske sezone, sudija ili kontrolor mora početi sa jedan stepen nižeg ranga takmičenja.

Ako mirovanje staža traje duže od tri takmičarske sezone, sudija ili kontrolor mora početi sa najnižeg ranga takmičenja.

O mirovanju staža odlučuje UO OS F BiH na prijedlog Komisije za sudijska pitanja OS F BiH u toku formiranja listi službenih lica.

#### Član 36.

Sudija koji sudeći utakmicu napravi takvu povredu Pravila igre zbog koje se mora igrati nova utakmica, automatski se skida sa sudijske liste stalnih takmičenja OS F BiH.

Tumačenje povrede Pravila igre iz prethodnog stava daje Komisija za sudijska pitanja OS F BiH.

#### Član 37.

Sudije i kontrolori sa liste za stalna takmičenja OS F BiH mogu obavljati službenu dužnost u nižem rangu takmičenja, drugim sportovima i savezima samo u onim kolima redovnih takmičenja u kojima nisu delegirani od strane vrhovnog sudije ili direktora takmičenja OS FBiH.

Izuzetno kontrolori mogu obavljati službenu dužnost u istom kolu, u nižem rangu takmičenja kada je obavljanje dužnosti povezano na istom putnom pravcu uz naplatu takse.

### VI - DELEGIRANJE SUDIJA I DELEGATA-KONTROLORA

#### Član 38.

Vrhovne sudije OS F BiH vrše delegiranje sudija za:

- stalna takmičenja u organizaciji OS F BiH.
- zvanična prijateljska takmičenja-turniri u organizaciji klubova članova OS F BiH na teritoriji na kojoj djeluje taj savez.
- zvanična prijateljska takmičenja reprezentacija BiH i zvanična međunarodna prijateljska takmičenja klubova koji se igraju na teritorijama na kojima djeluje taj savez (linijske sudije, zapisničare i pomoćnike zapisničara).
- Ovlaštena osoba od strane Upravnog odbora može izmijeniti delegiranje službenih lica ako su ona u interesu Klubova, pojeftinjenje utakmica, kvalitetnije suđenje itd.
- Klubovi ne mogu uticati na delegiranje službenih lica i nemaju pravo na nametanje istih ko će gdje biti delegiran. Službena lica mogu biti delegirana sa područja čitave Federacije BiH- na utakmice Super lige Federacije i Prve lige FBiH.

#### Član 39.

Delegiranje linijskih sudija, zapisničara i pomoćnika zapisničara za sva stalna takmičenja u OS F BiH vrše komesari osnovne sudijske organizacije (sudijski odbori ili druge sudijske organizacije) prema teritorijalnoj nadležnosti.

#### Član 40.

Direktor takmičenja OS FBiH vrši delegiranje delegata i delegata-kontrolora za stalna takmičenja u organizaciji OS F BiH

Direktor takmičenja OS FBiH može vršiti delegiranje delegata-kontrolora koji se nalaze na sudijskim listama OS F BiH te angažovati specijalnog posmatrača (supervizora) koji će ocijeniti rad kontrolora.

Klubovi ne mogu uticati na delegiranje službenih lica i nemaju pravo na nametanje istih ko će gdje biti delegiran. Službena lica mogu biti delegirana sa područja čitave Federacije BiH- na utakmice Super lige Federacije i Prve lige FBiH.

### VII - STICANJE PRAVA NA LICENCU

#### Član 41.

Odbojkaške sudije, delegati i kontrolori su stručna lica u odbojkaškom sportu u BiH, koja moraju imati licencu za obavljanje službenih dužnosti izdate od Komisije za sudijska pitanja OS F BiH.

#### Član 42.

Da bi sudija, delegat ili kontrolor dobio licencu OS F BiH za obavljanje službenih dužnosti na takmičenjima u organizaciji OS F BiH, neophodno je da ispunjava sljedeće posebne uslove:

- delegati ne moraju imati zvanje rang sudije,
  - da imaju sudijska zvanja-rang „REGIONALNI” ili “DRŽAVNI” sudija i više,
  - da je od strane sudijske komisije OS F BiH predložen na listu sudija ili kontrolora OS F BiH,
  - da je odlukom Upravnog odbora OS F BiH uvršten na listu sudija ili kontrolora OS F BiH,
  - da je prisustvovao seminaru (od početka do kraja) za sudije i kontrolore u organizaciji Komisije za sudijska pitanja OS F BiH i položio test kojim je obavljena provjera znanja.
  - da je na vrijeme izvršio sve finansijske obaveze prema savezu
- Odlukom o stavljanju na listu sudija, delegata i kontrolora stiču pravo na licencu.
- Službena lica uplaćuju članarinu da bi dobili licencu za tekuću sezonu na osnovu rađenog posla iz prethodne sezone i ista je za prethodnu sezonu.

#### Član 42.1.

Ako sudija ili delegate-Kontrolor nisu zadovoljili na testiranju onda će im se dati mogućnost da ponovo polažu testove u roku od 30 dana i plaćaju 200 KM +PDV za ponovno polaganje. Ukoliko ponovo ne polože neće im se izdati licenca za tekuću sezonu.

#### Član 43.

Sudijama, delegatima i kontrolorima sa liste OS F BiH licence izdaju i obrasce propisuju Komisija za sudijska pitanja OS F BiH. Ako je objedinjena dužnost delegata i kontrolora, licence moraju potvrditi-ovjeriti predsjednik Komisije za sudijska pitanja OS F BiH, na seminaru koji je obavezan za sva službena lica.

#### Član 44.

Licence sudija, delegata i kontrolora važe za takmičarsku sezonu za koju su izdate i ovjerene. Oduzimanje licenci u toku takmičarske sezone moguće je samo u slučajevima grubog kršenja Pravila igre zbog kojih se igra nova utakmica, Kodeksa ponašanja u OS F BiH, odsustva sa seminara sudija i kontrolora i ne izvršavanja finansijskih obaveza prema Savezu.

#### Član 45.

Po žalbi na odluku iz prethodnog člana, odlučuje Upravni odbor OS F BiH.

### VIII – NAKNADE SLUŽBENIM LICIMA

#### Član 46.

Odbojkaške sudije i delegati-kontrolori (službena lica) za obavljanje svojih dužnosti na zvaničnim utakmicama, imaju pravo na novčanu naknadu-taksu, putne i druge troškove i dnevnice, na osnovu propozicija određenog takmičenja.

U toku jednog dana, sudije mogu suditi više od jedne zvanične (prvenstvene ili Kup) utakmice.

#### Član 47.

Organizator utakmice obavezan je da službenim licima isplati sudijske takse i druge troškove u skladu sa važećim propozicijama.

#### Član 48.

Taksa za prvog sudiju i kontrolora je ista na svim utakmicama istog ranga takmičenja. Taksa za drugog sudiju je niža od pomenutih sl.lica.

Taksa linijskih sudija, zapisničara i pomoćnika zapisničara je ista na svim utakmicama istog ranga.

#### Član 49.

Visina taksi utvrđuje se Odlukom UO najmanje 15 dana prije početka takmičarske sezone.

#### Član 50.

Visina takse za zvanična prijateljska takmičenja na kojima učestvuju domaće ili inostrane ekipe, UO OSFBiH propisuje Odlukom o naknadama službenim licima.

#### Član 51.

Za zvanične i prijateljske utakmice reprezentacija BiH i sve utakmice na zvaničnim i prijateljskim međunarodnim turnirima koje organizuje OS F BiH službena lica obavljaju poslove volonterski uz obavezu OS F BiH ili tehničkog organizatora da obezbijedi prevoz, a u prostorijama dvorane osvježavajuće napitke i ishranu u skladu sa regulacijama CEV-a i Odlukom o naknadama službenim licima.

#### Član 52.

Ako se utakmica ne odigra iz bilo kog razloga a službena lica dođu na utakmicu, organizator je dužan isplatiti sve troškove predviđene propozicijama, kao i 50% predviđene takse.

Za utakmicu koja je započeta i iz bilo kog razloga prekinuta, službenim licima pripada puni iznos predviđene takse.

#### Član 53.

Ukoliko se utakmica igra radnim danom, kontroloru, prvom, drugom, kao linijskim i zapisničaru pripada naknada za izgubljeno radno vrijeme u visini 30% iznosa takse, gdje se ista uvećava, izuzetak su KUP utakmice FBiH koje su usvojene da se igraju po kalendaru takmičenja.

Ukoliko se utakmica igra radnim danom zbog promjene termina radi nastupa kluba u međunarodnim takmičenjima, nastupa igrača-ica za reprezentaciju BiH i nastupa klubova na međunarodnim utakmicama i tradicionalnim turnirima, za čije učešće postoji saglasnost nadležnog takmičarskog organa uvećanje takse iz stava 1. ovog člana neće se primjenjivati.

#### Član 54.

Putni i drugi troškovi i dnevnice službenih lica isplaćuju se u skladu sa važećim propozicijama.

#### Član 55.

Dnevnice službenim licima obračunavaju se na osnovu Odluke o naknadama službenim licima koju donosi Upravni odbor OSFBiH.

Visina dnevnice je ona koja je utvrđena Odlukom o putnim troškovima u OS F BiH.

### IX - FINANSIJSKE OBAVEZE SUDIJA I KONTROLORA

#### Član 56.

Radi finansiranja troškova službenih lica sa liste stalnih takmičenja OS FBiH, Službena lica obavezna su iznos od 10% od naplaćene takse uplaćivati na žiro račun OS F BiH - kao članarinu.

Uplata se vrši najkasnije do 10-og u mjesecu za prethodni mjesec, direktno na žiro račun OS F BiH. Sredstva koja se uplaćuju na račun OS FBiH iz ovog člana koriste se za rad sudijske komisije, rad Direktora takmičenja, rad Vrhovnog sudca, za potrebe dijela troškova kancelarije saveza, kancelarijskog materijala, održavanje web stranice itd.

#### Član 57.

Ostale finansijske obaveze sudija i kontrolora suđenja, predlažu nadležni sudijski organi OS F BiH a usvaja Upravni odbor OSFBiH.

#### Član 58.

Na utakmicama pod pokroviteljstvom OSFBiH mogu obavljati funkciju službenih lica za stalna takmičenja u OS FBiH žene sa hidžabom, s tim da moraju nositi majice sa oznakom OSFBiH, grb OSFBiH, bijeli kais i bijele patike.

### X - PRELAZNE ODREDBE

#### Član 59.

Komisija za sudijska pitanja OS F BiH utvrdit će oblik i sadržaj evidencija koje će voditi kancelarija OS F BiH o listama službenih lica po takmičarskim sezonama, o konačnim rang listama nakon završetka takmičarske sezone, mirovanju staža i oduzimanju licence.

Da bi neko od službenih lica u sezoni imao zamrznut status mora ispuniti sljedeće uslove:

- podnijeti pismeni zahtjev Komisiji za sudijska pitanja i UO OS FBiH.
- izvršiti sve finansijske obaveze iz prethodne sezone,
- izvršiti uplatu članarine za sezonu za koju traži zamrznuti status.

#### Član 60.

Uslovi za dobijanje licence :

- Izvršene sve finansijske obaveze za prethodne sezone,
- Plaćena članarina ,
- Prisustvo na seminaru,
- Položeni testovi znanja,
- Ispunjeni uslovi i dokaz o provedenom vremenskom periodu u određenim sudijskim zvanjima,
- Obavljen ljekarski pregled koji važi 2 godine samo za delegate, sudije Premijer lige i Sudije A i B liste Federalnih liga.

Član 61.

Tumačenje Pravilnika daje UO OS FBiH.

Član 62.

Pravilnik stupa na snagu danom donošenja.

Član 63.

Stupanjem na snagu ovog Pravilnika prestaje da važi Pravilnik o odbojkaškim sudijama ,delegatima ,delegatima –kontrolorima br: 1978-06/23 od 21.06.2023 god.

Broj: 2070-06/24

PREDSJEDNIK

Datum, 12-.06.2024. godine

Dr.sci. Miloš Jelčić